

INUIT ATAQATIGIIT

Inatsisartuni



11.februar 2017

UPA 2017/50

Inatsisartut suleriesianni § 33 naapertorlugu aaliangigassatut siunnersuut imaattoq matumuuna saqqummiuppara:

Naalackersuisut oqaatsinut kiffartuussivimmik pilersitseqqullugit aalajangiiffigisassatut siunnersuut. Oqaatsinik kiffartuussivik oqaatsinut siunnersortinik inuttaqassaaq, kalaallisut oqaatsitta atorneqarnerini nakkutilliiviussalluni aammalu siunnersuinermik neqerooruteqassalluni, tusagassiuutinilu oqaatsitta atorneqarnissaannik ilinniartitsiffiusinnaassalluni.

(Inatsisartunut ilaasorta, Mimi Karlsen, Inuit Ataqatigiit)

Tunngavilersuut:

UKA 2016-mi oqaluuserisassami 125-mi ima siunnersuuteqarpunga:

Inatsisartut aalajangiiffigisassaattut siunnersuut, tamatumuuna Naalackersuisut peqquneqassatut sulissutigissallugu, nunatsinni tusagassiuutini kalaallisut oqaatsitta atorluarneqarnerulernissaat.

Siunnersuut partiinit tamanit akuerineqarpoq. Naalackersuisut akissuteqaatiminni siunnersuut akuersissutigivaat oqaatigalugulu tamanna pisartoq tusagassiuutinut tapiissuteqarnermi Namminersorlutik Oqartussat oqaatsinik sallititsisarnissamik piumasaqaateqartarnerisigut.

Inuiaavugut nunanit allanit sunnerneqalerattali oqaatsitta illersornissaannik suliaqartuartut. Oqaatsitsinnik illersuiurnitta kingunerivaa naggueqatigiinni Inunni kisiartaaleratta oqaatsitsinnik atuiulluartut, ineriartortitsisut aammalu nunattalu inuisa amerlarnepaartaasa oqaatsivut atugaralugit. Tamanna naggueqatitsinni takussaangilaq. Naggueqatitta inuusuttaasa oqaatsitik ilaatigut annaasimavaat, tuluttuinnarlu oqalulersimallutik.

Nunatsinni oqaatsivut kinaassutitsinnut nukittoqutigalugit ingerlajuarsimavugut. Namminersuleratta nunatsinni oqaatsivut pisortatigoortumik oqaasiuneri naqissuserneqarput. Tamannalu pisussaaffiliivoq. Pisussaaffiliivoq oqaatsitsinnik ineriartortitsiarnissamik, navianartorsiorlutullu inissikkaangata illersuinnissamik, soorlu siuligut aamma taama pisartut.

Maanna inuiattut namminersortutut tunngaviummik inatsisitaarnissarput alloriarfiginialerparput. Piareersagassarpasuit suliarisariaqarpagut. Inuiattullu naalagaaffeqartutut ingerlassagutta oqaatsivut nukittusariaqarput. Inuiannit allanit ingiarneqassanngillat, suusupagineqassanngillat. Oqaatsivummi kinaassutitsinnut tunngaviliisuusarput, kinaassutitsinnik oqaluttuartuusarput, qanorlu oqariartuuteqarniaraangatta sakkugivagut. Oqaatsivut nukittupata inuiaaussaagut nukittuut.

Siuliani siunnersuutigisanni eqqartortarpara tusagassiorfiit nunatsinni oqaatsitsinnik ineriartortitsinatillu ataqqinninnginnerujussuat. Tusagassiorfinni oqaatsivut danskisuumiit nutsikkatut atorneqartarput, ilaatigullu kukkunilimmik atorneqartarlutik. Tamannalu

allanngortittariaqarparput. Tusagassiorfiit neqeroorfigineqarsinnaasariaqarput oqaatsitsinnut pikkorissarnissaminnik aammalu siunnersorneqarnissaminnik.

Taamaamat maanna siunnersuutigivara aalajangersimanerusumik tusagassiuutini oqaatsitta atorluarneqarnissaannik oqaatsinik kiffartuussivimmik pilersitseqqusillunga.

Oqaatsinut kiffartuussiviup suliassarissavai tusagassiuutini oqaatsitta pitsaasumik ineriartorfiusumillu atorneqarnissaat aqutissiuutissallugu.

Oqaatsinut kiffartuussiviup suleriaasissaa Islandimi tv-qarfiup RUV Islandimiut oqaasianik illersuiniarlutik ineriartortitsiniarlutillu suleriaassiannut assingusinnaapput. Kalaallisut oqaatsitta tusagassiuutini atorneqarnerisa illersorneqarnissaat ineriartortinneqarnissaallu anguniarlugu makku oqaatsinik kiffartuussiviup ingerlassinnaavai.

Tusagassiorfinnut oqaatsitsinnik atuinermut siunnersortaallutillu oqaatsinik ilinniartitsisarsinnaapput.

Oqaatsit eqqortumik atorneqarnersut, qanorlu oqaasertaliisoqarsinnaanermik nakkutilliisinnaapput. Tusagassiuutit oqaatsinut politikissaannut ikiuussinnaapput. Siunnersuinermi makku suliaasinnaapput:

Nutaarsiassanik atuaqqissaarinerit, - sulisunut pikkorissaanerit,- qanoq taasisarnissamik siunnersuineq, - aammalu sinerissami oqaatsitsinnik atuisunut attaveqaataallutik.

Oqaatsinut kiffartuussivik Namminersorlutik Oqartussat suliffeqarfiutaani Oqaasileriffimmi inissinneqarsinnaavoq, tamannali Naalakkersuisunut nalilerneqarumaartoq naatsersuutigaara.

Ingerlatsinikkut aningaasatigullu pisortanut kingunerisinnaasai.

Pilersaarusiorneq iliuuseqaateqarnissarlu aningaasartuuteqarfiusussaassaaq. Tassalu AC-mut ¼ ukiumut Oqaatsinut kiffartuussiviup pilersinnissaanut atorneqassalluni inatsisip allanngornissaanut, apeqqutaalluni Naalakkersuisut oqaatsinut kiffartuussivik sumut inissinniarnaat. Taamaattorli naatsorsuutigineqartariaqarani tamatumunnga aningaasartuutit ukiumut AC-mut aningaasartuutaasartumut ataatsimit annertunerunissaa, tassalu 500.000.

Anigaasarsiornikkut ingerlatsinikkut suliffeqarnikkut namminersortunut kingunerisassai.

Soqanngilaq

Innuttaasunut aningaasarsiornikkut ingerlatsinikkullu kingunerisassai.

Soqanngilaq